

Date – 20/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Vawiin hi Mizoram State din champhaphak a ni a, state pumah sorkar chawlh puan niin, zirna in leh sorkar pisa te khar a ni.**
- 2. Larsap Gen (Rtd) Vijay Kumar Singh chuan Bana Kaih scheme in a tum ber chu Viksit Bharat 2047 leh United Nations Sustainable Development Goals (SDGs) hlawhtlinna kawnga tha thawh ve a ni a ti.**
- 3. Rekha Gupta chu Delhi Chief Minister thar atan vawiinah lakluh a ni dawn.**
- 4. Punjab sawrkar chuan police official 52 chu eiruknaa an inhnamhnawih avangin a ban.**

<><><>

STATE DAY OF PRAYER

Vawiin hi Mizoram State din champhaphak a ni a, state pumah sorkar chawlh puan niin, zirna in leh sorkar pisa te khar a ni.

ZPM a sorkar hnuah nikum atang khan, he ni hi Mizoram pumah ram tana tawngtai rualna ‘State Day of Prayer’ atana hman a ni a. State Day of Prayer hi hlawhtling taka hman a nih theih nan Aizawl mai bakah District tinah inpuahchah a ni a, Kohhran te’n hemi ni hi anmahni remchan dan anga hmang theuh tura ngen a ni bawh a ni.

<><><>

UNION MINISTER

Union Minister of State for Micro, Small and Medium Enterprises; Labour & Employment Pi Shobha Karandlaje chuan Union Budget 2025 -2026 sawi hona hmanpui turin Mizoram a rawn tlawh.

BJP- Mizoram chuan Central hruaitute ruahman anga kum tina an tih thin angin Union Budget zir hona leh sawi hona hi a buatsaih a, mizo mipuiten Union Budget chu mipui Budget a ni tih an hriat a, Union Budget a Mizoram in an chanvo an chan theihna tur zirchian a pawimawh avang leh tangkai zawk a chhawr theihna atana buatsaih tur “Conference/Workshop on Union Budget 2025-2026’ chu Hotel Regency Conference Hall-ah nimin tlai khan neih a ni.

Pi Karandlaje-i chuan India ram than dan leh a bikin Mizoram in a state pum anga a hlawkpui theih dan te an hriat ngei a duh a ti a, India ram sum leh pai dinhmun a that a, ram dinhmun sawhngheh a nih phawt chuan,

ramchhunga cheng mipuite an him ang a, rampawn mi te pawhin an rawn pan tawh zawk dawn a ni a ti.

Union Budget chungchang inzirirna leh inhrilhna hi BJP Mizoram chuan state level mai ni lo, District leh Block level thleng a buatsaih turin ruahmanna siam a ni a, Union Minister hian vawiin hian Aizawla BJP State Office-ah hun a hman zawhah thuthar thehdarhtute a kawm dawn a ni.

<><><>

ASSEMBLY SESSION

Mizoram Legislative Assembly Budget Session chu nimin khan Legislative Assembly House, Aizawlah tan a ni.

Budget Session tan niah hian Larsap Gen (Rtd) Vijay Kumar Singh chuan thusawiin Legislative Assembly Annual Budget Session chu sorkar pawisa lut leh chhuak tarlanna satliah mai ni lo, mipuite tana sorkar hmachhawp leh ruahmannate tarlanna a nih thu a sawi a, assembly session-a thil sawi ho leh rel te chuan mipui tan hmasawwna a thlen ngei a beisei a ti. Mizoram Legislative Assembly-in rorelna kalphung zahawm tak vawnhim kawngah sulhnu duhawm tak a lo nei tawh thin tih sawiin, member-te chu he sulhnu chhuanawm tak hi chhawmnung zel turin a sawm a ni.

Budget Session hi ni 14 chhung an thu dawn a, March ni 4-ah Finance changtu Chief Minister-in Mizoram Budget (2025–2026) a pharh dawn a, Session hian March ni 20 thleng a awh ang.

<><><>

GOVERNOR – HANDHOLDING SCHEME

Larsap Gen (Rtd) Vijay Kumar Singh chuan Bana Kaih scheme in a tum ber chu Viksit Bharat 2047 leh United Nations Sustainable Development Goals (SDGs) hlawhtlinna kawnga tha thawh ve a ni a ti.

Larsap hian nimin khan Mizoram Legislative Assembly Budget Session thutkhawm hmasa berah thu sawiin Mizoram sorkar flagship program Bana Kaih in a tum ber chu India in kum 100 a tlin huna ram hmasawn a nihna tura tha thawh ve tur leh Mizoram chu hmasawn zinga a tel ve theih na tur a ni a ti a, kuthnathawktuten intodelhna tlak eizawwna ngelnghet an neih theih nan leh hmasawwna rualkhai siam nan ruahmanna hrang hrang a chhawmdawl tum an ni a ti a, hmasawwna chu mi tin thleng phak a nih theih nan hmalak a ni a ti bawk.

Larsap chuan Bana Kaih hmalakna kalpui dan tur hlawm 5 ah then a ni a ti a, heng zingah hian sorkar thawhpui bank leh financial institution ten Progress Partner te hnenah Loan an pe dawn a, heng mi te tan hian sorkar chuan Credit Guarantee Scheme awmsa hmangin Guarantor-ah a tang dawn a, hemi atan hian sorkar chuan bank pathum - State Bank of India (SBI), Mizoram Rural Bank (MRB), and Mizoram Cooperative Apex Bank Ltd (MCAB) te chu inremna thuthlung a ziah pui tawh a ti a, Handholding Policy hnuaiah Chief Minister's Special Category Scheme siam a ni tih sawiin tanpuina cheng nuai khat chin pek chhuah a ni dawn tih a sawi.

<><><>

CM

Chief Minister Pu Lalduhoma hovin Health Minister Pi Lalrinpuii, Adviser to CM Pu TBC Lalvenchhunga leh official pawimawh te leh Non-Government Hospital Association of Mizoram (NGHAM) member ten nimin khan CM Office-ah Mizoram Health Care Scheme thar tur duan mek an thlir ho.

NGHAM member te hian sorkarin an ruahmanna te chipchiar taka a sawipui avangin lawmthu an sawi a. Hun kal tawha harsatna an lo tawh dan te an tarlang bawk.

Mizoram sorkar hian khua leh tui zawng zawng huapzo Health Care Scheme thar (Universal Health Care Scheme) tur a duang mek a. Scheme ruahman mek leh private Hospital te inkaihhnawihna lai nimin khan an sawi a ni.

<><><>

E-RAM PORTAL

Revenue Minister Pu B. Lalchhanzova chuan nimin khan e-ram portal go-live na hun a hmang.

Directorate of Land, Revenue & Settlement Conference Hall-a hun hmanah Revenue Minister Pu B.Lalchhanzova chuan, surveyor indaihlohna avanga ram teh tur rei tak tak nghah ngai thin chu survey firms te e-ram kaltlanga hman theih a ni ta chuan mipui tan awlsamna nasa tak a thlen a beisei thu sawiin, Go-live a nih theih nana tihfel ngai leh siam rem ngai te siam a nih hnuah a taka mipui leh office lama thawktu ten an hmang tan thei tawh tur chu lawmawm a tih thu a sawi a. e-ram chu sawrkar langtlang, mipuite awlsamna thlen tu leh eirukna dona kawnga hmanraw pawimawh tak a nih tur thu a sawi bawk a ni.

E-ram ah hian service sawm leh pakhat (11) a awma: ram teh, ram teh that, ram then, ram pawhkhawm, ram hmingthlak leh a dangte chu office a kal kher tawh lovin online in mahni awm hmun atangin dil tawh tur a ni dawn a. A dil dan hi process awlsam te mah nise mahnia ti thiam lo tan pawh Common Service Centre (CSC) kaltlangin dilna te chu a thehluh theih dawn a ni.

Mipui te chuan e-ram hmang hian an dilna te an thehluh bakah, an dilna in a ken tel fee zawng zawng pawh online in an pe vek thei tawh dawn a, an dilna thlen chin leh khawiah nge a tan tih te an hmu thei vek tawhin, office kal buai kher ngai lovin an thil dil thlen chinte an hre thei vek tawh dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

MNYF

MNYF Hqrs Vice President Pu Lalnunmawia Pautu leh General Secretary-te chuan nimin khan Mizoram Public Service Commission (MPSC) tlawhin an hmalâknate leh an dinhmunte an zirchiang a, thuam chak thuai ni se an duh tih thuchhuah siamin an sawi.

ZPM sorkarin MSSSB thiatin MPSC thuam chak a ni ang tia an sawi angin Mizoram sorkarin MPSC a thuam chak lo tih a hmuna kalin an hmuchhuak an ti a, an thuchhuaha an tarlan danin, thawktu lakbelh chungchangah leh infrastructure siambelh chungchangah pawh hma an la nep hle a, MSSSB thiah a nih hnuah MPSC hnuaia exam conduct-te result rei tak chhuak thei lovin a awm thin. Hei hi thalai hna zawng leh zawng zel tur tam takte tân a pawî êm êm a ni, an ti.

MPSC an thuam chak ang tia sorkarin a lo tiam tawh ang ngeiin thawktute pawh lakbelha an mamawh angte phuhru turte, exam conduct apianga sikul building hman ngai lo tura ruahmanna thar siam a, MPSC Exam hall building zau tha zawk buatsaihsak se tiin Mizoram sorkar an phût a. A thawktu tur an pek sa bakah an mamawh ang zel a thuam chak turin an phut a, duh khawp awm si lova a thu chauha thuam chak lo turin sawrkar an phut bawk a ni, an ti.

MNF Thalaite chuan MPSC an tlawh atang hian ZPM sorkarin zirchianna nei miah lova MSSSB a thiah pawizia an hmuchhuak tih an sawi a ni.

<><><>

FEDERATION ENCLAVE SAMPLE FLAT

Aizawl Ainawn Venga Federation of Mizoram Goverment Employees & Workers te bultuma sak mek Federation Enclave Sample Flat leh Community Centre chu Pu Lalduhoman nimin khan a hawng.

Chief Minister chuan, Aizawl khawpui chu a tawtin inkalpawhna leh vantlang hmunhma thar siam tura thil tih a harsa tawh hle a. FMGE&W leh Blue Mountain te hmalak ang hian, Aizawl chheh vela inhmun neitute leh developer te tangkawpin housing complex tha tak tak, mipuite lei phak tur ngei ni si, din nual thei se, Aizawl hmel chu nasa takin a danglamin a changkang ngei ang a ti a. He Housing Complex hi tuang takin puitling thuai se a duhsak tak zet a ni, a ti.

Mizoram Government Employee Housing Society Chairman, Pu Hmingchungnunga chuan Mizoram sorkar hnathawkten transfer and posting vanga chenna in din kawnga harsatna an tawh thin chhawk zangkhai a, an tana loan hmanga awlsam taka in saksa lei tur an neih theih nana buatsaih a nih thu a tarlang a. A dinna hmun ram hi sorkarin a pek a ni a. Kum 2027-ah hna hi zawh an tum dawn a, booking hi an hawng tan a ni. Kum khat chhung sorkar hnathawk tan an hawng phawt ang a, chumi hnuah a duh apiang tan hawn zui a ni tawh ang.

Federation Enclave hi FMGE&W hnuaia Mizoram Government Employees Housing Society te chuan Blue Mountain Engineering & Services Limited nena tang dunin chhungkaw 350, mihring 2000 vel chen theihna tur Housing Complex hi kum 10 vel kalta atang khan an buaipui tan a. Nimina

hawn hi Complex Community Centre building niin, he building-ah hian Sample Flat an dah nghal a. Chief Minister hian Sample flat hi a en kual bakah heng flat sak tur lei duh tute tana hauh theih hun a puang nghal bawk.

<><><>

DELHI

Rekha Gupta chu Delhi Chief Minister thar atan vawiinah lakluh a ni dawn. Nizana Delhi BJP Legislature Party meeting-ah Rekha Gupta hi Delhi Chief Minister atan thlan a ni a. Rekha Gupta hian Delhi LG VK Saxena chu a chenna Raj Niwas ah hmuin sawrkar thar a siam theih thu a sawi a ni.

Rekha Gupta hi Delhi Assembly inthlan neih zawh takah khan Shalimar Bagh atangin thlan tlin a ni a. Politics zinkawng hi Delhi University hnuaia Daulat Ram College atangin ABVP member niin kum 1992 ah bul a tan a. Delhi University Students' Union President a ni tawh a. Delhi BJP Mohila Morcha ah General Secretary a ni tawh bawk a ni.

Pi Rekha Gupta hi vawiin chhun dar 12.35 ah Ram Lila Madian ah LG VK Saxena chuan rinawmna thu tiam tirin a lalut dawn a. He hunah hian Prime Minister Narendra Modi, Union Home Minister Amit Shah leh Defence Minister Rajnath Singh te pawh an tel dawn a. State 20 vel atangin Chief Minister leh Deputy Chief Minister te an tel dawn bawk a ni.

<><><>

PUNJAB

Punjab sawrkar chuan police official 52 chu eiruknaa an inhnamhnawih avangin a ban. Punjab Police Chief Guarav Yadav chuan Chandigarh-ah chanchinbumite hmaah he thu hi puangin Police ban zingah hian Inspector pakhat, Assistant Sub-Inspector 5, head-constable 4 leh constable 42 an nih thu a sawi a.

Chief Minister Bhagwant Mann hoa police hotute thukhawmin eirukna tibo tura hma an lakna avanga hetianga ban hi an nih thu a sawi a ni.

<><><>

CEC

Cheif Election Commissioner thar Gyanesh Kumar chuan vawiin atangin a hna a tan. Pu Gyanesh Kumar hian CEC chhuak ta Rajiv Kumar a thlak a. Mipuite hnena a thuchahah CEC thar chuan a hna hmasa berah vote thlak chu ngaih pawimawh anih tur thu sawiin kum 18 tling tawh khua leh tui zawng zawngte vote neih tir leh vote thlak tir anih tur thu a sawi a ni.

CEC a ruat anih hma hian Pu Kumar-a hi Election Commissioner a ni a. Nikum March ni 15 atang khan he hna hi a chelh tawh a.Kum 1988 IAS officer Kerala cadre a ni a. Union Ministry of Parliamentary Affairs ah Secretary nihna a chelh tawh a ni. CEC rual hian Dr.Vivek Joshi chu Election Commissioner atan ruat thar a ni bawk a. Dr. Joshi hi kum 1989 IAS batch Haryana Cadre a ni

<><><>